



MSM Malaysia alami kerugian RM32 juta bagi suku kedua

Wartawan BH

bhbiz@nstp.com.my

August 22, 2024 @ 9:43pm



Industri gula tempatan terus berdepan dengan kos input yang tinggi - NSTP/SAIFULLIZAN TAMADI

KUALA LUMPUR: MSM Malaysia Holdings Bhd (MSM) mencatatkan kerugian sebelum cukai (LBT) sebanyak RM32 juta bagi suku kedua tahun kewangan berakhir Disember 2024.

Pengeluar jenama gula bertapis terkemuka negara 'Gula Prai' itu terjejas oleh kos operasi yang lebih tinggi dan keuntungan bukan operasi yang lebih rendah berbanding LBT yang dicatatkan pada suku yang sama tahun lalu sebanyak RM14 juta.

MSM Malaysia walau bagaimanapun mengekalkan tinjauan menguntungkan untuk tahun ini dengan keuntungan sebelum cukai (PBT) sebanyak RM34 juta bagi separuh pertama 2024.

Selain itu, terdapat juga peruntukan perakaunan sekitar RM18 juta untuk potensi pembalikan pada separuh kedua 2024.

Hasil untuk suku kedua tahun kewangan 2024 meningkat kepada RM833 juta, 12 peratus lebih tinggi berbanding RM746 juta untuk suku sama tahun lalu dan kumpulan mencapai faktor penggunaan (UF) yang lebih tinggi sebanyak 50 peratus pada suku dikaji berbanding 48 peratus pada suku sama 2023.

Selain itu, terdapat peningkatan dalam hasil kecekapan, mencapai 95.6 peratus pada suku kedua tahun kewangan 2024, meningkat daripada 94.9 peratus pada suku sama tahun lalu.

Walau bagaimanapun, kos pengeluaran meningkat sebanyak 14 peratus didorong oleh NY11 yang 12 peratus lebih tinggi, kos pengangkutan 18 peratus dan pertukaran asing lima peratus lebih tinggi, meskipun kos penapisan lebih rendah berikutan UF yang bertambah baik.

Ketua Pegawai Eksekutif Kumpulan MSM, Syed Feizal Syed Mohammad, berkata industri gula tempatan terus berdepan dengan kos input yang tinggi, didorong oleh harga pengangkutan global dan gas asli yang tinggi secara berterusan.

Tambahan pula, katanya harga gula mentah adalah tidak stabil disebabkan oleh jumlah pengeluaran gula global yang berubah-ubah.

"Di tengah-tengah cabaran ini, kumpulan terus komited untuk mengukuhkan jualan domestik kami di samping meningkatkan usaha dalam pasaran eksport, yang sehingga kini menembusi 20 negara," katanya dalam satu kenyataan hari ini.

Walaupun MSM Prai mempunyai kecekapan yang matang sebagai salah satu kilang penapisan gula terbaik di Asia, MSM Johor mempunyai peluang besar untuk menjadi pusat penapisan gula bersepada bertaraf dunia, menawarkan produk nilai tambah dan penyelesaian hiliran untuk memenuhi permintaan di rantau ASEAN.

Dengan penambahan dua gudang penyimpanan gula bertapis yang baharu dilancarkan, MSM Johor menyasarkan untuk mengembangkan kapasiti penyimpanan dalamannya, menambah fasiliti pembungkusan CGS, dan akhir sekali mengurangkan kebergantungan pada penyewaan gudang luaran.

Kumpulan tetap berhati-hati tentang risiko yang disebabkan oleh ketegangan geopolitik yang semakin meningkat, serta boleh memberi kesan kepada kos input dan prestasi kewangan.

HEADLINE	MSM Malaysia alami kerugian RM32 juta bagi suku kedua
MEDIA	Berita Harian - Online
DATE	22 August 2024, 9:43pm
BY	Wartawan BH
LINK	https://www.bharian.com.my/amp/bisnes/korporat/2024/08/1288717/msm-malaysia-alami-kerugian-rm32-juta-bagi-suku-kedua